

## Könne Pruume kruupe?

von Johannes Toups

Mösche Mattes wonde onge en Lotum an de Merjebröck. An die Eck Krefelsche Stroot Krahnejaat hadd hä enne schöne jroote Obbsbongett. Op de Bongett stonge e janz Dehl schöne jroote Pruumbööm.

Et solde Pruumepannekook jäëve. On vör de jroote Huushalt londe et sech, die lange Lädder en derr Boom te stelle, dänn enne Bratsch voll bruggde Mooder Lippke vör all die Mäuler satt te krieje.

Wie Mattes boove en derr Boom am plöcke woer, koome die Blaare von de Krahnejaat on frorden:

„Mösche Ohme, hässde och e paar Pruume vör oss?“ Mattes, enne Kengerfrönd, schmeed e paar Hoffele Pruume e-raff.

Die Blaare sette sech jemühtlich em Jraas on lejten sech die Pruume jout schmecke. Op emol frord dat kleen Pälche: „Mösche Ohme, könne Pruume kruupe?“ Mösche Mathes: „Enä Jong, Pruume könne doch net kruupe.“ – „Mösche Ohme, ech jlöf, dann han ech en Schneck jejääte!“ säht dat kleen Päulsche on vertrock dobej janz schön et Jesecht.